

էր ցուցադրել իրենց ուժերը և հրապարակային բնոյթ տալ պայքարին Հայաստանի իշխանութեան դէմ*):

Յունւ. 31ի ձերբակալութիւնները նիւթ դարձան և խորհրդարանական հարցապնդման: Փետր. 20-ին սոց.—յեղափոխական պատգամաւոր Վահան Մինախորեանը կառավարութեան ուղղեց հետևեալ հարցապնդումը.

«Յունւ. 31-ին ներքին գործոց նախարարի կարգադրութեամբ Երևանում և Դիլիջանում ձերբակալուել են մի քանի անձնաւորութիւններ. պատճառաբանութիւնն այն է, թէ յիշեալ անձինք ունեցել են հակապետական և հակակառավարչական ընթացք, սակայն, նրա կարգադրութեան մէջ չի յիշատակուում որևէ օրէնք, ազդ կամ, նոյնիսկ բերանացի նախադաշնացում, որի հիման վրա կարելի լինէր արգելափակման ենթարկել քաղաքացիներին: Ժամ. Կառավարութեան հրատարակած օրէնքը, որի վրա հիմնուած պիտի լինի յիշեալ կարգադրութիւնը, բոլորովին այլ բան է ասում, և հէնց այդ տեսակէտից կատարուած փաստը ասօրինութիւն է:

Միւս կողմից, պարզ պիտի լինէր, թէ քաղաքական հոսանքի դէմ է ուղղուած այդ հալածանքը, թէ՞ սոսկ անհատների: Եթէ առաջինն է, ապա դա ասօրինութիւն է, որովհետև քաղաքական հոսանքը պիտի ադատ լինի որևէ հետապնդումից. եթէ երկրորդն է, ապա ո՞ւր է այն կօնկրեա մեղադրանքը նրանց կատարած գործերի: Նրանց հրատարակած մէկ գիրքը, բաց թողած թուուցիկը չեն պարունակում որևէ հակապետական կամ հակակառավարչական բովանդակութիւն, իսկ տաճիկ փաշաների հետ համաձայնութիւն կնքած լինելու լուրերը փաստացիօրէն ասպացուցուած չեն: Այսպէս նայելով խնդրին՝ սոցիալիստ.—յեղափոխական Փրակցիան կատարուած ձերբակալութիւնները համարում է ասօրինի և առաջարկում է ազատել նրանց»:

Զուտ ձևական—իրաւաբանական տեսակէտից սոց.—յեղափոխականների մեղադրանքը, գուցէ, և իրաւացի էր. այն ժամանակները պետական ո՞ր պաշտօնեան էր այնքան հմուտ գոյութիւն ունեցող օրէնքների մէջ, որ կարողանար անթերի կերպով, պետական օրէնքի բոլոր պահանջներին համապատասխան ձևակերպել իր գործերը: Սակայն, ըստ էութեան սոցիալիստ.—յեղափոխականները, ի հարկէ, անարդար էին. նրանք շատ լաւ ծանօթ էին բոլշևիզմի էութեան և հայ բոլշևիկները գործունէութեան բնոյթին, որպէսզի կարողանային պնդել, թէ՛ «նրանց հրատարակած մէկ գիրքը, բաց թողած թուուցիկը չեն պարունակում որևէ հակապետական կամ հակակառավարչական բովանդակութիւն»: Եւ նախարարի տւած բացատրութիւններն ու յետագայ վիճարանութիւնները լիովին հաստատեցին այս պարագան:

*) Արշակ Զոհրաբեանը ռուսական սոցիալ-դեմոկրատիայի յայտնի դեմքերից էր և մտերիմ բարեկամ Ժորդանիայի ու Ռամիշվիլիի: Ռուսական յեղափոխութիւնից յետոյ գործում էր Կովկասում, վրաց մեմշեիկների հետ միասին, հակառակորդ էր բոլշևիկների և դաշնակցականների: Վրաստանի անկախութիւնից յետոյ, անցել էր ընդդիմադիրների կողմը և, իբրև միջազգայնական, քննադատում էր վրաց մեմշեիկների արարքները: Այս պատճառով, հալածանքի ենթարկւեց Վրաստանում և իր երէկւայ ընկերների ձեռքից ազատուելու համար՝ փախաւ Երևան: Հայաստանի կառավարութիւնը խոստացել էր քրան կարեւոր մի պաշտօն, սակայն, նա վարակւեց բժաւոր տիֆով և յունւար 4-ին մեռաւ: